

Godina V - Broj 19, Četvrtak, 14. septembra 2000. godine

KANTONALNA AGENCIJA ZA PRIVATIZACIJU

Na osnovu odredaba čl. 10. i 16. Zakona o Kantonalnoj agenciji za privatizaciju ("Službene novine Kantona Sarajevo", br. 6/97 i 7/00), Upravni odbor Kantonalne agencije za privatizaciju Sarajevo, na petoj sjednici održanoj 12. juna 2000. godine, donosi

STATUT

KANTONALNE AGENCIJE ZA PRIVATIZACIJU

I - OPĆE ODREDBE

Član 1.

Kantonalna agencija za privatizaciju (u daljem tekstu: Agencija) osnovana je Zakonom o Kantonalnoj agenciji za privatizaciju ("Službene novine Kantona Sarajevo", br. 6/97 i 7/00 - u daljem tekstu: Zakon).

Član 2.

Naziv Agencije je: Kantonalna agencija za privatizaciju Sarajevo.

Sjedište Agencije je u Sarajevu, ulica Maršala Tita 11.

Skraćeni naziv Agencije je: KAP Sarajevo.

II - PRAVNI POLOŽAJ AGENCIJE

Član 3.

Agencija je specijalizovana organizacija Kantona Sarajevo (u daljem tekstu: Kanton Sarajevo).

Član 4.

Agencija ima svojstvo pravnog lica sa pravima, obavezama i odgovornostima utvrđenim Zakonom i ovim statutom.

Agencija je odgovorna za obaveze koje proizilaze iz njenog poslovanja.

Član 5.

Odredbama ovog sporazuma utvrđuju se:

osnove organizacije i način poslovanja Agencije,

nadzor, upravljanje i rukovođenje Agencijom,

zastupanje, predstavljanje i potpisivanje Agencije,
radnici sa posebnim ovlaštenjima i odgovornostima,
druga pitanja u vezi s poslovanjem Agencije.

Član 6.

Agencija ima 1 (jedan) žiro-račun, a može imati podračune.

Prihodi iz poslova privatizacije vode se na podračunima.

Član 7.

Agencija ima pečat okruglog oblika, promjera 50 i 30 mm.

Pečat u koncentričnim krugovima sadrži tekst: Bosna i Hercegovina, Federacija Bosne i Hercegovine, Kanton Sarajevo, Kantonalna agencija za privatizaciju Sarajevo.

Agencija ima i štambilj koji služi u unutrašnjem uredskom poslovanju Agencije.

Agencija može imati i žig za plombiranje promjera 15 mm koji sadrži sve podatke kao i pečat.

Način upotrebe, čuvanja i zaštite pečata, štambilja i žiga utvrđuje se aktom koji donosi direktor Agencije.

III - DJELATNOST I NADLEŽNOST AGENCIJE

Član 8.

Djelatnost Agencije je obavljanje stručnih i s njima povezanih upravnih i drugih poslova koji se odnose na provođenje propisa iz oblasti privatizacije.

Član 9.

Radi ostvarivanja zadataka utvrđenih Zakonom, Agencija obavlja stručne i druge poslove u vezi sa privatizacijom, i to:

inicira i učestvuje u pripremi i donošenju zakona i drugih propisa u području privatizacije;

sarađuje sa nadležnim ministarstvima, Agencijom za privatizaciju u FBiH, kantonalnim agencijama za privatizaciju i drugim organima za privatizaciju;

organizuje i podstiče privatizaciju preduzeća na području Kantona;

odobrava u skladu sa Zakonom i drugim propisima početni bilans i program privatizacije preduzeća;

odobrava, sprovodi i nadzire privatizaciju preduzeća na području Kantona;

zaključuje ugovore o privatizaciji preduzeća nakon prodaje preduzeća;

posreduje u zaključivanju ugovora između prodavca i kupca kada su predmeti prodaje imovina ili dijelovi preduzeća;

organizuje i podstiče obrazovanje i stručno usavršavanje iz oblasti privatizacije;

pruža savjetodavnu pomoć preduzećima na području Kantona iz oblasti privatizacije;

organizuje i provodi informativno-propagandnu djelatnost iz oblasti privatizacije;

vodi evidencije i statistike u okviru svog djelokruga;

podnosi izvještaj o toku i rezultatima procesa privatizacije Vladi Kantona i Skupštini Kantona;

obavlja i druge poslove iz djelokruga rada Agencije utvrđene Zakonom i drugim poslovima i po nalogu Upravnog odbora, Vlade Kantona i Skupštine Kantona.

IV - FINANSIRANJE AGENCIJE

Član 10.

Sredstva za osnivanje i poslovanje Agencije osiguravaju se iz:

dijela prihoda koji se ostvari u procesu privatizacije, u skladu sa odgovarajućom odlukom Skupštine Kantona;

budžeta Kantona;

donacija i dotacija;

naknada za usluge;

i drugih izvora.

Član 11.

Iz sredstava Agencije izmiruju se obaveze Agencije, obezbjeđuju sredstva rada i poslovanja, plaće zaposlenih, te podmiruju troškovi i zadaci u skladu sa Zakonom i drugim propisima Federacije Bosne i Hercegovine i Kantona Sarajevo.

Član 12.

Finansijski plan i Program rada Agencije, na prijedlog direktora, donosi Upravni odbor Agencije.

Finansijski plan i Program rada Agencije donosi se u toku tekuće za narednu godnu.

V - UPRAVLJANJE I RUKOVOĐENJE AGENCIJOM

Član 13.

Agencijom upravlja Upravni odbor Kantonalne agencije za privatizaciju (u daljem tekstu: Upravni odbor).

Član 14.

Upravni odbor ima predsjednika i 6 (šest) članova.

Upravni odbor na prijedlog Vlade Kantona imenuje i razrješava Skupština Kantona.

Upravni odbor se imenuje na 2 (dvije) godine.

Član 15.

Agencijom upravlja Upravni odbor.

U ostvarivanju svoje funkcije Upravni odbor:

donosi Statut Agencije uz saglasnost Vlade Kantona;

donosi Poslovnik o radu Upravnog odbora;

donosi Pravilnik o unutrašnjoj organizaciji Agencije na prijedlog direktora;

donosi Pravilnik o plaćama i drugim primanjima radnika Agencije, na prijedlog direktora;

donosi finansijski plan i Program rada Agencije na prijedlog direktora;

donosi završni račun i Izvještaj o radu Agencije;

donosi odluku o tarifi - naknadi za obavljene poslove;

osniva komisije i radna tijela Agencije, donosi odluku o angažiranju savjetnika;

donosi Pravilnik o poslovnoj tajni;

odobrava početni bilans i program privatizacije preduzeća koja su u nadležnosti Agencije;

predlaže imenovanje i razrješenje direktora Agencije i zamjenika direktora Vladi Kantona;

odobrava prodaju državnog kapitala putem neposredne pogodbe;

inicira i učestvuje u pripremi i donošenju zakona i drugih propisa u području privatizacije;

sarađuje sa nadležnim ministarstvima, Agencijom za privatizaciju u FBiH, kantonalnim agencijama za privatizaciju i drugim organima za privatizaciju;

donosi odluke o politici i mjerama organizovanja i podsticanja privatizacije;

donosi odluke o politici i mjerama, organizovanja i podsticanja obrazovanja i stručnog usavršavanja iz oblasti privatizacije;

određuje politiku, mjere i način posredovanja u pregovorima sa kupcima “državnog kapitala“ i

obavlja i druge poslove u skladu sa Zakonom i Statutom.

Član 16.

Predsjednik Upravnog odbora saziva sjednice, predlaže dnevni red sjednica, predsjedava sjednicama i potpisuje odluke i druge akte Upravnog odbora.

Predsjednika, u slučaju njegove spriječenosti, zamjenjuje najstariji član Upravnog odbora.

Član 17.

Predsjednik i članovi Upravnog odbora imaju pravo naknade za svoj rad u Upravnom odboru, kao i pravo na naknadu ostalih troškova u vezi prisustva na sjednicama.

Visinu naknade utvrđuje Vlada Kantona Sarajevo na prijedlog Upravnog odbora.

Član 18.

Upravni odbor za svoj rad odgovoran je Vladi Kantona i Skupštini Kantona.

Član 19.

Nadzor nad zakonitošću rada i finansijskom poslovanju Agencije provodi Nadzorni odbor.

Član 20.

Nadzorni odbor se sastoji od predsjednika i 4 (četiri) člana.

Nadzorni odbor može raditi i donositi odluke, ako su pored predsjednika prisutna najmanje 2 (dva) člana Nadzornog odbora.

Nadzorni odbor na prijedlog Vlade Kantona Sarajevo imenuje i razrješava Skupština Kantona.

Nadzorni odbor se imenuje na 2 (dvije) godine.

Član 21.

Nadzorni odbor:

kontrolira zakonitost rada Agencije i njenog organa;

razmatra izvještaj Agencije o provođenju privatizacije prije njihovog upućivanja Vladi i Skupštini Kantona i daje mišljenje Upravnom odboru o tome;

razmatra finansijski plan, finansijski izvještaj i program rada Agencije i daje svoje mišljenje Upravnom odboru;

donosi Poslovnik o radu.

Član 22.

Predsjednik i članovi Nadzornog odbora imaju pravo naknade za svoj rad u Nadzornom odboru, kao i pravo na naknadu ostalih troškova u vezi prisustva na sjednicama.

Visinu naknade utvrđuje Vlada Kantona Sarajevo na prijedlog Upravnog odbora.

Član 23.

Agencijom rukovodi direktor. Direktor ima zamjenika.

Direktora i zamjenika imenuje i razrješava Vlada Kantona na prijedlog Upravnog odbora.

Direktor i zamjenik Agencije imenuju se na period od četiri godine, a nakon isteka ovog perioda mogu biti ponovo imenovani.

Član 24.

Direktor Agencije u svom radu:

rukovodi Agencijom;

predstavlja i zastupa Agenciju, odgovara za zakonitost rada, pravilno i zakonito vođenje materijalnog i finansijskog poslovanja Agencije;

odlučuje o zapošljavanju i raspoređivanju radnika;

donosi pojedinačne upravne akte iz djelokruga Agencije;

sprovodi odluke, zaključke i upute Upravnog odbora i Nadzornog odbora;

osigurava pripremanje materijala, stručnih i drugih informacija potrebnih za raspravljanje i odlučivanje, priprema prijedlog odluka, zaključaka i drugih općih i pojedinačnih akata za sjednice Upravnog i Nadzornog odbora;

predlaže donošenje Pravilnika o unutrašnjoj organizaciji Agencije;

donosi odluke o investicionim ulaganjima u skladu sa odobrenim finansijskim planom;

donosi poslovne odluke, rješenja i druge akte o poslovanju u skladu sa zakonom i Statutom;

u ime Agencije zaključuje ugovore o prodaji preduzeća i dijelova i

obavlja i druge poslove propisane zakonom i Statutom.

Član 25.

Direktora Agencije u slučaju njegove odsutnosti i spriječenosti zamjenjuje zamjenik direktora.

Za svoj rad direktor i zamjenik odgovaraju Upravnom odboru i Vladi Kantona.

Član 26.

Direktor i njegov zamjenik mogu podnijeti ostavku.

Ostavka mora biti pismeno obrazložena.

U slučaju podnošenja ostavke funkcioneri iz stava 1. ovog člana ostaju na dužnosti do razrješenja, a najdulje 3 (tri) mjeseca od dana podnošenja ostavke.

VI - OSNOVE ORGANIZACIJE

Član 27.

Unutrašnje organizovanje Agencije, način rada, broj izvršilaca, struktura i naziv radnog mjesta utvrđuje se Pravilnikom o unutrašnjoj organizaciji Agencije.

Član 28.

Organizacione jedinice u Agenciji su sektori i službe.

Broj sektora i službi, njihov naziv i djelokrug rada utvrđuje se Pravilnikom o unutrašnjoj organizaciji Agencije.

VII - JAVNOST RADA AGENCIJE

Član 29.

Agencija osigurava javnost rada saradnjom sa sredstvima javnog informisanja, te izvještavanjem javnosti o radu i poslovanju Agencije.

Pravo i dužnosti informisanja o radu Agencije imaju: predsjednik i članovi Upravnog odbora po prethodnom dogovoru sa Upravnim odborom, predsjednik Nadzornog odbora, direktor i zamjenik direktora Agencije.

Član 30.

Radi potpunijeg informisanja javnosti o svom radu i poslovanju, Agencija može izdavati posebne publikacije (biltene i glasila), odnosno primjereno koristiti pisane i elektronske medije.

Programsku koncepciju publikacija, kao i bliže uslove izdavanja, svojom odlukom utvrđuje Upravni odbor.

VIII - POSLOVNA TAJNA

Član 31.

Poslovnu tajnu i drugu tajnu čine dokumenti i podaci čije bi saopštavanje neovlaštenoj osobi štetilo interesima i ugledu Agencije ili subjektima koji su te dokumente dostavili Agenciji.

Član 32.

Upravni odbor općim aktom određuje koji se podaci i dokumenti smatraju tajnom, način postupanja s tim dokumentima i podacima, kao i mjere njihove zaštite.

Član 33.

Obavezu čuvanja poslovne tajne imaju svi zaposleni u Agenciji, predsjednik i članovi Upravnog i Nadzornog odbora kao i sve osobe koje posjeduju poslovnu tajnu po prirodi svog posla.

Obaveza čuvanja poslovne tajne ostaje i poslije prestanka radnog odnosa u Agenciji, a odnosi se i na osobe iz stava 1. ovog člana.

Član 34.

Dostavljanje dokumenata i podataka kroz izvještaje koje je Agencija dužna dostavljati nadležnim tijelima i institucijama Federacije i Kantona, kao i drugim ovlaštenim institucijama, ne smatra se odavanjem poslovne tajne.

IX - OPĆI AKTI AGENCIJE

Član 35.

Ako Zakonom ili ovim statutom nije drugačije odlučeno, opće akte donosi Upravni odbor.

Član 36.

Statut Agencije objavljuje se u "Službenim novinama Kantona Sarajevo".

Ostali opći akti u pravilu oglašavaju se na oglasnoj ploči Agencije.

Član 37.

Izmjene i dopune općih akata vrše se na način i po postupku njihovog donošenja.

X - IZMJENE I DOPUNE STATUTA

Član 38.

Prijedlog izmjena i dopuna Statuta Agencije mogu dati Vlada Kantona, Upravni odbor, Nadzorni odbor i direktor Agencije.

Član 39.

O izmjenama i dopunama Statuta odlučuje, uz saglasnost Vlade Kantona, Upravni odbor.

XI - PRELAZNE I ZAVRŠNE ODREDBE

Član 40.

Tumačenje odredbi ovog statuta i akata koje sam donosi daje Upravni odbor.

Član 41.

Danom stupanja na snagu ovog statuta prestaje primjena odredaba Statuta Kantonalne agencije za privatizaciju ("Službene novine Kantona Sarajevo", broj 21/97).

Član 42.

Ovaj statut stupa na snagu danom dobijanja saglasnosti Vlade Kantona, a objavit će se u "Službenim novinama Kantona Sarajevo".

Broj 21-01-49-1016 28. jula 2000. godine Sarajevo

Predsjednik Upravnog odbora prof. dr.Dragoljub Stojanov, s. r.